

መልክአ ማርቆስ

ሰላም ለክሙ ወንጌላውያን አበውየ። መሰልኩክሙ በእንስሳሁ ዕሩየ **፪ማ፡** እምኔክሙ **ማርቆስ** አንበሳ ተሰምየ **ማ፡** ወ**ሰላም** ለርእሱ ዘንኤምኖ በዝየ። በእንተ ክርስቶስ ዘያረ እንተ ስምዕ ሥቃየ።

ሰላም ለማርቆስ ዘእኅተ በርናባስ እሙ። አርዘ ሊባኖስ ይመስል መልክአ ገጹ ወፍፅሙ **፪ማ፡** በመካን ዕውቅ ዘዓፀደ ላህም ስሙ **ማ፡** ሰሐብዎ ከመ ይቤላ እንዘ ያንጸፈጽፍ ደሙ። ወውስተ እሳት ወደይዎ ኢውዕየ ዳዕሙ ።

ሰላም ለማርቆስ ለማርያም ዕጓላ። ዘሰሐብዎ አይሁድ ውስተ ዓፀደ ላህም ከመ ዲቤላ **፪ማ፡** አመ አውዕዮቶ ፈቀዱ ለእሳት በነበልባላ **ማ፡** ዝናም ወአስሐትያ አጥፍአ ማዕበላ። መብረቅኒ ለሥጋሁ ከለላ።

አባ ክቡር አባ ክቡር **ማርቆስ** መምህር። ብእሴ እግዚአብሔር። ውስተ ኹሉ ግብፅ አድያሚሃ አድመፅከ በስብከትከ ወንጌላዊ ።

ሰላም ለፅንሰትከ በሀገረ ዐባይ ገሊላ። ወለልደትከ ትለድ አዕላፈ ፍጽም ወከዋላ **፪ማ፡** ሊቀ ጳጳሳት **ማርቆስ** ዘግብፅ ወዘደወላ **ማ፡** ከመ መሐልኩ ወአጥባዕኩ ለስብሐተ ስምከ ተድላ። ለውሂበ ፈውስ እምሕማም ሀበኒ መሐላ ።

ሰላም ለዝክረ ስምከ ዘአፈ አምላክ ወደሶ። ወለሥዕርትከ ሜላት ዘዕርቃነ ርእስከ ለብሶ **፪ማ፡** ሐዲስ ልቡና **ማርቆስ** ለብልየተ ልብ ዘትሔድሶ **ማ፡** ሐድስ ኅሊናየ ወለሥጋየ ቀድሶ። አኮኑ በላዕሌየ ለጌጋይ አንገሦ ።

ሰላም ለገጽከ ምስለ ቀራንብት ወአዕይንት። እለ ድኅረ ሌሊት ኢኖማ በእብሬተ ክርስቶስ መዓልት **፪ማ፡** ሞተ ረሲዓን **ማርቆስ** ወለምእመናን ሕይወት **ማ፡** እስመ ተበዋሕከ በላዕለ እሉ ሀብታት፡ ሀበኒ ሀብተ ዘባቲ ምሕረት።

ሰላም ለአዕዛኒከ ወለመላትሒከ ዘተዛወጋ። ፍሬያተ ሮማን አዕናፈ እንበለ ይኅድጋ **፪ማ፡** ቀናዒ **ማርቆስ** ለእንተ ተዓቢ ጸጋ **ማ፡** ረስየኒ እቅናዕ ለገብርከ እንዘ እትቀነይ በሥጋ፡ እስመ በላዕሌየ ገብሩ ሕማማት እንግልጋ ።

ሰላም ለከናፍሪክ እለ መሀራ ወንጌለ። ምስለ ኣፉክ ወኣስናንክ እስከ ቤተ ጣዖት ንህለ **፪ማ፡** አመ ሰበክ **ማርቆስ** ክርስቶስሃ ስቁለ **ማ፡** መሰልኮሙ ለኣብዳን ከመ ልቡናሁ ዘሐጉለ። ወለጠቢባን ዘወለጠ ቃለ ።

ሰላም ለልሳንክ ወለቃልክ ሰባኪ። በኃይለ እስትንፋስ ዘይረድእ ወንጌለ መለኮት መሐኪ **፪ማ፡** ሱራፌላዊ **ማርቆስ** ቀዳሴ ቅዱስ መላኪ **ማ፡** ለዮሐንስ ሕሊናየ ከመ ለዕለት ኢይስኩ። ምሥጢረ መጽሐፍ ኣእምሮ እንዘ ትብል ኢትብኪ ።

ሰላም ለጉርዔክ ወለክሣድክ ዘተስሕበ፤ ምስለ መታክፍት በሐብል ሶበ መሀርክ ኣሕዛበ **፪ማ፡** ኮከበ ምድረ ግብፅ **ማርቆስ** እንተ ትተሉ ኮከበ **ማ፡** እምያዕቆብ ዘሠረቀ ከመ ቃለ ነቢይ ነበበ። ኣትልወኒ እባእ ሐዳስ ክብካበ።

ሰላም ለዘባንክ ወለእንግድዓክ ምስለ ሕፅን። ዘበላዕሌሁ ረፈቀ ብሉየ መዋዕል ሕፃን **፪ማ፡** ምግባረ ቃለ ጽድቅ **ማርቆስ** ወወንጌላዊ ኣሚን **ማ፡** ዘተምህረ በቃልክ ይትሜሐር እምደይን። እስመ ኅበ ኣምላክ ሀላወክ ሀላዊ ኪዳን።

ሰላም ለኣዕዳዊክ በሀብለ ኣፅራር እለ ተኣሥራ። ምስለ መዛርዕ ወኩርናዕ ሶበ ሠናያተ ገብራ **፪ማ፡** መልኣክ ምድረ ግብፅ **ማርቆስ** ለቤተ ክርስቲያን በእንተ ፍቅራ **ማ፡** በጻሕክ እስከ ለሞት ምስለ ምዕት ሐራ። አመ ኣዘዘክ ለድንግል በኹራ ።

ሰላም ለእመታቲክ ወለእራኅቲክ ዘመጠዋ ። ምስለ ኣፃብዕ ለነፍስ ኅብስተ ሕይወት ዘየሐይዋ **፪ማ፡** ቤተ መቅደስ ሕግ **ማርቆስ** ኪሩቤል ዘይኬልልዋ **ማ፡** በግዑ ቅዳሴ ወቃለ ስብሐት ጣዕዋ። ካህናተ ሰማይ በውስቴታ ይሠውዑ ነዋ።

ሰላም ለኣጽፋረ እዴክ ዘምስለ ገቦ ወከርሥ። እለ ነበራ ሥቃየ በእንተ **ኢየሱስ ክርስቶስ** **፪ማ፡** ዘተድላ መንበርክ ፍትሕ **ማርቆስ** ንጉሥ **ማ፡** ፈኑ ሐራክ ምሕረታተ እማዕሠረ ሥጋ በፈውስ። ከመ ይፍትሕዋ ለሕምምት ነፍስ ።

ሰላም ለልብክ ወለኹልያቲክ በሀልዮ። እለ ይፀውራ ወትረ እንበለ ጽርዓት ወተኅይዮ **፪ማ፡** ቀዳሚሁ ለወንጌል እንዘ ለክርስቶስ ትሰምዮ **ማ፡** ጊዜ መሀርክ **ማርቆስ** ልቡና አሕዛብ ጌግዮ። ኅዲገ ይኅድግ ዘባዕዳን ተቀንዮ ።

ሰላም ለአማዑቲክ ዘእምንዋየ ውስጥ ኢተፈልጠ። ወለሕንብርትክ ውስቴቱ ዘበደመ ሥርዓት ተለብጠ **፪ማ፡** ታቦተ ሃይማኖት **ማርቆስ** ዘበወርቀ ምግባር ተሰውጠ **ማ፡** እምቅድስት ዓለምን እንተ ትጸንሕ ኅዳጠ። ሙሴ ወልደ አምላክ አብኣክ ውስጠ ።

ሰላም ለሐቋክ ወለአቀኅያጺክ ምስለ አብራክ። እለ አንሐ ሰጊደ ዘይሄለስ አምላክ **፪ማ፡** ለዓለመ ዓለም **ማርቆስ** ዘኢትመውት መልአክ **ማ፡** ዓውደነ ዕቀብ እምጸላኢ ፀረ ነፍስን ድሩክ፤ መልአክ ረድኤት ከመ ዐቀቦ ለኤልሣዕ ቡሩክ ።

ሰላም ለአዕጋሪክ ወለሰኳንዊክ ዘኢደክማ። ምስለ መከየድ ወአፃብዕ አመ በዓውደ ስምዕ ቆማ **፪ማ፡** ኢያሱ **ማርቆስ** ድቀተ ንግሣ ወጥቅማ **ማ፡** ለኢያሪኮ ምድረ ግብፅ ማኅደረ ነፍስ ዘማ። በኃይለ ዕረፍትክ ይስሰል እምላዕሌየ ፃማ ።

ሰላም ለአጽፋረ እግርክ ወለቆምክ ዘዐቀምዎ። ቅድመ ገጸ ንጉሥ ዓላውያን ከመ ይቅሥፍዎ **፪ማ፡** ንጉሠ ምድረ ግብፅ **ማርቆስ** ዘኢተአምር ሐስዎ **ማ፡** ለምንት ኃይለ ደዌ ለሕይወትየ ጼወዎ። እንዘ ለመልእክት ምስሌክ እፈቱ ሀልዎ ።

ሰላም ለመልክእክ ዘሣቀይዎ በበዶታ፡ አፅራረ ሃይማኖት እምሥጋ ለነፍስክ አመ ፀአታ **፪ማ፡** ለፍኖተ ክርስቶስ **ማርቆስ** እንዘ ትተሉ ፍኖታ **ማ፡** ለግብፅ ኃይለ አምላካዊ አመ ገበርክ ውስቴታ። አማልክቲሃ ተዘርጪ ወወድቀ ትውክልታ ።

ሰላም ለበድነ ሥጋክ ዘገነዝዎ አዕሩግ። እለ በፍቅርክ ወጽኡ እምፍቅረ ጣዖት ጸዋግ **፪ማ፡** ሙሴ **ማርቆስ** እንዘ ረዳኢትክ ሕግ **ማ፡** ተቃተል ለሕዝብክ ኢይቅትሉን በደርግ። ሕማም ሲዎን ወጌጋይ አግ ።

ሰላም ለዕለተ ሞትክ ዕለተ ነጐድጓድ ወመብረቅ።
ወለመቃብሪክ ክብርት በምድረ መሥራቅ። በላዕለ
ሊቃናት ኹሎሙ **ማርቆስ** ሊቅ። ጽድቅክ ሞዓ ውኅየለ
ኅይለ ፍቅረ አዕሩግ ወደቅ። እስመ እምኹሉ ኃይል
ዘይመውዕ ጽድቅ።

ሰላም ለትንሣኤክ ዕለተ ብዙኅ ሃሌ ሉያ ። ወለዕርገትክ
በክብር መንገለ ዓርገ ኬንያ። ዜናዌ ተድላሃ ለነፍስ
ማርቆስ ሐዋርያ። ዜንወኒ ተድላ ነፍስየ እንዘ ትኔጽር
ብካያ። እስመ ኃጢአት ለስን ፈድፋደ አድወያ።
አምኃ ማኅሌት ነፍስየ እንዘ ትፀውር በርእሳ። አመ ነገደት
ኅቤክ በዕለተ ፍትሕ ወኃሠሣ። ዓቃቤ ሥራይ **ማርቆስ**
ለነፍስ ሕሙማን ዘትኄድሳ። ለፌ ሕማም ወለፌ አበሳ።
እስመ አቀራሰልዋ ዘልፈ አስተዳሉ ፈውሳ።
ኦ አምላክ **ማርቆስ** ዕቀበኒ ወአድኅኒኒ እመከራ ሥጋ
ወነፍስ ሊተ ለገብርክ ዕገሌ ለዓለመ ዓለም አሜን።